

Leksyon

2



"ANG DIOS"

Tun-i sumala sa mga pahimangno nga imong makita sa sinugdan sa unang leksyon.

1. Unsa Ang Dios?

- Ang Dios Espiritu.

Juan 4:24. Ang Dios Espiritu, ug ang mga magsimba kaniya kinahanglan managsimba diha sa espiritu ug sa kamatuoran.

2. Pila ba ang Dios?

- Adunay usa lamang ka matuod nga Dios. Deut. 6:4. Magpatalinghog ka, O Israel, si Jehovah nga atong Dios, maoy usa lamang ka Jehovah.

3. Pila ka persona ang Dios?

- Adunay tutulo ka persona sa pagkaDios: Amahan, Anak, ug ang Espiritu Santo.

Mateo 28:19. Busa panglakaw kamo ug himoa ninyong mga tinun-an ang tanang kanasuran sa pagpamautismo kanila sa ngalan sa Amahan ug sa Anak ug sa Espiritu Santo.

4. Paghingalan ug pipila ka mga kinaiya sa Dios.

- Ang Dios maayo, balaan, matarung, gamhanan labaw sa tanan, nasayud sa tanan ug walay katapusan.

Exodo 34:6. Ug si Jehovah miagi sa iyang atubangan ug nagmantala: Si Jehovah usa ka Dios nga maluloy-on, mapu-anguron, mahinay sa pagkasuko, ug daku sa mahigugmaong kalolot ug kamatuoran.

Leviticus 11:44. Kay ako man si Jehovah nga inyong Dios, busa kay ako balaan man, balaanon ninyo ang inyong kaugalingon.

Daniel 4:35. Ug ang tanang mga pumoloyo sa yuta gipangisip nga walay nahot, ug Siya nagabuhat sumala sa iyang kabubut-on diha sa mga panon sa langit, ug taliwala sa mga pumoloyo sa yuta, ug walay makapugong sa iyang kamot, kon makasulti kaniya: Unsay imong ginabuhat?

Hebreohanon 4:13. Ug sa panan-aw sa Dios walay binuhat nga natago, hinonoa ang tanang butang binuksan ug dayag sa mga mata niya ug kinsa magahatag ra unya kitag husay.

Pinadayag 10:6. Ug nanumpa pinaagi, niadtong buhi hangtud sa kahangturan, nga mao ang nagbuhat sa langit ug sa mga ania niini.

5. Unsa ang atong angay pagabuhaton ngadto sa Dios?

- Atong higugmaon ang Dios labaw sa tanan.

Mateo 22:37. Higugmaa ang Ginoo nga imong Dios sa tibook mong kasingkasing ug sa tibook mong salabutan.

ANG IMONG PAGABUHATON

1. Sublia pagsag-ulo ang mga sag-ulohon sa unang leksyon.
2. Kon masag-ulo na nimo pag-ayo ang mga sag-ulohon, tubaga ang mga pangutana sa Talaan sa Tinun-an" alang sa ika-duha nga leksyon.